

aber hat er sich geoffenbaret vnd also wil er von sich gehalten haben, das, ob
 er wol ein ewiger warhafftiger Son Gottes ist, von ewigkeit vom Vater ge-
 born, eines thuns vnd wesens, gleicher gewalt vnd Ehre mit dem ewigen Va-
 ter, so hab er sich doch des elends vnser armen, verlornen, verdampften
 5 Menschen also erbarmet vnd angenommen, das er nicht allein mit einer demü-
 tigen furbitt bey seinem ewigen Vater für vns gebeten vnd auff sich den
 Zorn Gottes vnd Fluch des Gesetzes geladen, sondern auch sich endlich so
 tieff ernidriget hat, das er Knechtsgestalt vnd vnser armes Fleisch vnd Blut
 mit allen seinen eigenschafften vnd schwacheiten one Sünde an sich geno-
 10 men hat vnd vns, seinen Brüdern, durchaus vnd in allem, ausgenommen die
 Sünde, gleich worden vnd in der angenommenen volkommenen Menschlichen
 Natur hie auff Erden, da er vnschuldig gewesen, vnser schuld vnd Sünde
 getragen, für dieselbige gnug gethan, den Zorn Gottes gestillet, den [24r:]
 Fluch des Gesetzes, die Sünde, den Tod hinweg genommen, den Teufel vber-
 15 wunden, die Helle zerstöret durch sein bitter leiden vnd sterben vnd durch
 seine fröliche Aufferstehung vnd Himelfart vnd wil in demselben vnserm
 Fleisch vnd Blut vnser Bruder sein vnd bleiben, sich vnser annemen, so wir
 vns durch waren Glauben auch sein annemen vnd an jm fest halten werden,
 vnd ob wir wol den zeitlichen Tod vmb der hinderstelligen Sünde willen er-
 20 dulden vnd ertragen müssen, so wil er doch vns am Jüngsten tage von
 Todten aufferwecken, wie er durch die krafft seiner Göttlichen Natur seinen
 todten Leib aufferwecket vnd Seel vnd Leib widerumb zusammenbracht vnd
 vereinigt hat, vnd wil vns auch mit newen verklärten Leiben bekleiden, die
 seinem herrlichen Leibe sollen gleichförmig sein,⁵⁵ vnd wil vns bey sich in
 25 ewigkeit behalten vnd ewiges Liecht, Gerechtigkeit, freude vnd heiligkeit
 mitteilen.

Dis ist die warhafftige Lere von der Menschwerdung vnser Herr vnd Hei-
 lands Jhesu Christi, welche vns der Herr Christus selbst vnd die heiligen
 Aposteln geleret, derselben Discipel vnd Zuhörer vnd die jnen nachgefolget
 30 haben, fortgepflantzet, die bewerten Concilia, sonderlich Nicaenum, Ephesi-
 num, Chalcedonense, Constantinopolitanum, wider die Ketzer erstritten, die
 Christlichen Keiser durch öffentliche edicta vnd Befehl bestetigt, die heili-
 gen Merterer mit jrem Blut versiegelt, die Kirchen in Graecia vnd die Röm-
 sche Kirche, was den gantzen Artickel anlangt von der Person Christi, bis
 35 auff diese zeit in die funffzehnhundert jar stet vnd fest erhalten vnd vnser
 Praeceptores in dieser Schulen vnd Kirchen allezeit widerholet haben. Des-
 sen wollen wir zu diesem mal nur etliche wenig gezeugnis, beweisung vnd
 erklerungen für den gemeinen Man anziehen, bis so lang durch Gottes gnade
 ausführlicher vnd weitleufftiger be-[24v:]richt in Latinischen Schrifften hier-

Was für ein Lere
 sey, die bisher erze-
 let ist von beiden
 Naturn vnd dersel-
 ben vnterscheid in
 Christo.

⁵⁵ Vgl. Phil 3,21.